

E tragedia na Simeon Antonio (3)

Pa Clyde Harms

Dia 26 di ougùstùs, djasabra último, a hasi 57 aña ku un avion di Marine Luchtvaartdienst a krèsh na Simeon Antonio, Aruba. E artíkulo aki a aparésé den korantnan lokal na di 50 aniversario di e aksidente desastroso aki. Mi ta spera ku e komunidat arubiano, despues di a lesa e historia aki, tambe lo sinti meskos ku ami, e admirashon pa e bomberonan ku a riska nan propio bida pa salba bida di un próhimo i protehá propiedat partikular. Un monumento, maske ta un simpel plakát kionmemorativo chikitu, pa rekordá e desaster aki i honra e bomberonan, lo ta na su lugá.

Investigashon

Naturalmente a bini un investigashon di e suseso trágiko aki. Marinirnan a rekohé tur e restunan di avion i a hiba nan Savaneta, kaminda nan a wòrdu empaká i mandá pa Kòrsou pa ekspertonan di MLD investigá kilo por a kousa e aksidente.

Asina mes nan a bolbe diferente biá pa buska un kos ku aparentemente tabata hopi importante, pero nan no a haña.

Dia 28 di ougùstùs MLD a organisá den un hangar di e base marinir na Kòrsou un seremonia solèm pa rekordá e víktimanan di e tragedia na Simeon Antonio.

Entre e oradornan tabatin e gobernador di Antia Hulandes, Nicolaas Debrot.

E viudanan di Ypma i Mantel, e dos víktimanan ku tabata biba na Kòrsou, tambe tabata presente.

Seremonia

Kuater dia despues di e tragedia, Bestuurscollege di Aruba ku Gezaghebber Oscar Henriquez a tene un seremonia pa honra e bomberonan pa nan aktuashon eksepsional durante e desaster na Simeon Antonio.

Den su kalidat di hefe di Brandweer, Gezaghebber Henriquez a dirigí palabra na e masoménos kuarenta bombero i polis miembro di Brandweer ku a partisipá den e pagamentu di kandela i e reskate di e víktimanan kousá pa krèsh di un avion di MLD.

Den su diskurso, Gezaghebber Henriquez a elogiá e bomberonan pa nan 'teamwork' ku a pèmití nan vense e kandela den un tempu relativamente kòrtiku. El a alabá direktiva di Brandweer pa e bon preparashon i e ensayonan ku a hasi e

tim asina efektivu.

Pero mas ku tur otro kos, Gezaghebber Henriquez a elogiá e bomberonan pa nan kurashi pa enfrentá un situashon masha peligroso. Paga kandela ta trabou di bombero, pero e kandela aki tabata uno kompletamente diferente ku otronan ku peliger hopi grandi. Nan heroismo a salba bida di un persona i preveni e desaster di bira un kástrofe mayor.

Gratifikashon

Pa último, Gezaghebber Henriquez a sorprendé esnan presente ku e anunsio ku Bestuurs College a disidí di regalá e promé dies bomberonan a yega na e kandela un gratifikashon ku a resultá di ta un suma di 250 florin.

Entre e diesnan tabatin sinku hulandes oropeo: Pabe Kooistra, Jesir de Boer, H. W. J. Brugman, A. A. W. (Tony) Hijmering i su ruman Evert Hijmering.

E arubianonan tabata Hubert Leonardo, Rufo Lampe, Oscar Arrindel, Damian Maduro i Albert Tromp.

Livia Lampe ta kòrda ku nunca el a sinti su mes asina orguyoso di su Rufo.

Epilogo 2016

Na 1966 ami tabata doño di e kas na

Alablancastaat 4.

Mi mes tabata na New York, preparando pa bai traha na Libia. Mi mayornan i un ruman tabata biba den Alablancastaat. Un otro ruman tabata biba den e kaya pa sùit, Kolibriestraat.

Inkreiblemente, den tur e añanan ku a pasa nunca mi a tende di e desaster.

Chito Angela a konta mi di e aksidente di avion.

Intrigá, mi a bai biblioteca na Bachstraat, kaminda mi a haña basta informashon, pero no satisfasé mi curiosidat.

Mi a papia ku Comandant de Cuba di Brandweer, kende no tabatin muchu pa ofresé mi, ademas di su koperashon ku a resultá super balioso. Ta Comandant de Cuba a duna mi nòmber di Rufo Lampe, kende, huntu ku su esposa Livia, a resultá un fuente balioso di informashon.

Mi charla ku Oscar Henriquez tambe tabata hopi fruktífero. Originalmente mi a haña e impreshon ku e avion a kai den un otro kurá. Unabes ku mi a destilá e informashon ku mi a rekohé, mi a konkluí ku ta den kurá di mi amigu Ildo Ponson e avion a kai.

Ildo ku Emma a yena hopi buraku den e ta-

bla di informashon. Ta remarkabel ku ningun hende tabatin un potrèt relashoná ku e aksidente.

Na ofisina di Brandweer di aeropuerto un tempu tabatin un plakát ku Gezaghebber a otorgá e departamentu durante e seremonia di homenahe i un potrèt di e grupo, pero esenan a bai pèrdí dia ku nan a muda.

P'esei, mi a reprodu-sí algun di e korantnan di 50 aña pasá. Anke nan no ta di kalidat haltu, nan ta agregá hopi balor na e storia.

Epilogo 2023

Mi ta spera ku e comunidad Arubiano, despues di a lesa e historia aki tambe lo sinti, meskos ku ami, e admiracion pa e bomberonan ku a riska nan propio bida pa salva bida di un próhimo y proteha propiedad partikular.

Mi ta kere ku un monumento, maske ta un simpel plakaat conmemorativo chikito, pa recorda e desaster aki i honra e bomberonan, lo ta na su lugá.

Mi ta spera ku Minister Rocco Tjon lo por desvela un plakaat dia 26 di augustus 2023, e di 57 aniversario.

FIN



Despues di dirigí palabra, Gezaghebber Henriquez a felisitá e bomberonan personalmente i presentá na kada un di nan un sertifikado di mérito (Foto Beurs en Nieuwsberichten)



Kurpanan di dos víktima riba suela banda di e avion. E víktima na robes ainda tabata na bida, pero el a fayesé un ratu despues (Foto Amigoe di Curaçao)